



Erik Jensen
Inatsisartunut ilaasortaq, Siumut
inatsisartut@inatsisartut.gl

**Nuummi, Ilulissani, Qaqortumilu mittarfiit pillugit § 37 naapertorlugu
apeqquteqaammut 2025-142-mut akissut**

Dato: 25-09-2025
Sagsnr.: 2025 – 17352
ID. Nr. 77896320

Asasara Erik Jensen

Inatsisartut suleriaasianni § 37 naapertorlugu Nuummi, Ilulissani, Qaqortumilu mittarfiit pillugit Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909
3900 Nuuk
Tlf.: (+299) 34 50 00
E-mail: box909@nanoq.gl
www.naalakkersuisut.gl

**Apeqqut 1: Angalatitseqatigiiffiup Air Greenlandip Nuummi mittarfiup
atulerneraniit ullumikkumut aningaasat katillugit qanoq amerlatigisut
kinguaattoornerit peqqutigalugit aningaasartuuteqarneroreerpat?**

Akissut: Akissuteqarnissamut atatillugu Air Greenland A/S-imit paasissutissat pissarsiarineqarput, tassanilu ima paasissutissiivoq:

"Piffissaq eqqornagu timmisartuussinerni toqqaannartumik aningaasartuutini 2025-mi juulimi amerliartortitat malillugit Air Greenland 89,2 MDKK-inik atuivoq, tamannalu 2024-mut sanilliukkaanni 38,2 MDKK-inik qaffariarnerulluni. Ingerlatseqatigiiffik 2024-mi timmisartuussiniernermini annertuumik aamma eqqugaanikuuvoq.

Siuliani aningaasani malitsigisaanik aningaasartuutit, soorlu qaangiuttoornerni, saniatigut timmisartuussinerni (ilaatigut Nuup qulaavaanerani), mittarfinnik ammaanermi kiisalu piffissaq eqqornagu timmisartuussinernut atatillugu orsussamut, allatigullu timmisartut nikerarnerinut aningaasartuutit ilaatinneqanngillat."

Apeqqut 2: Illoqarfik Nuummi kinguaattoornernut aningaasartuutit katillugit qanoq annertussuseqarpat?

Akissut: Akissuteqarnissamut atatillugu Air Greenland A/S-imit paasissutissat pissarsiarineqarput, tassanilu ima paasissutissiivoq:

"Juulimi amerliartortitat malillugit Nuummi 25,9 MDKK-it aningaasartuutigineqarput."

Apeqquut ingerlatsisunut, timmisartuutiqatigiiffinnullu allanut Naalakkersuisut ingerlateqqinngilaat, pissutsit taakkua ingerlatseqatigiiffiit nammineq pigineqartut ingerlatsinerinut, aningaasartuutaannullu tunngassuteqarmata.

Apeqquut 3: Kinguaattoornermut aningaasartuutini nunap immikkoortuini qanoq aggulugaappat?

Akissut: Akissuteqarnissamut atatillugu Air Greenland A/S-imit paasissutissat pissarsiarineqarput, tassanilu ima paasissutissiivoq:

"Nunap immikkoortuinut agguataarigaanni isumaqannginnerussammat, tulluuttumi aningaasartuutit agguataarneqarnerini attartornerit ilanngunneqanngillat, piffissarli eqqornagu timmisartuussinerni aningaasartuutit allat imak agguataarsimapput:

- | | |
|-----------------|-----------|
| • Avannaani | 22,3 MDKK |
| • Qeqqani | 13,2 MDKK |
| • Nuummi | 25,9 MDKK |
| • Kujataani | 9,9 MDKK |
| • Nunani allani | 8,1 MDKK" |

Apeqquut ingerlatsisunut, timmisartuutiqatigiiffinnullu allanut Naalakkersuisut ingerlateqqinngilaat.

Apeqquut 4: Kinguaattoornermut aningaasartuutini suut peqqutigalugit kinguaattoortoqarnerisooq immikkoortiterneqartarpat?

Akissut: Akissuteqarnissamut atatillugu Air Greenland A/S-imit paasissutissat pissarsiarineqarput, tassanilu ima paasissutissiivoq:

"Piffissaq eqqornagu timmisartuussinerni toqqaannartumik aningaasartuutit, tulluuttumi aningaasartuuteqarfiusut malillugit immikkoortiterneqarput:

- Ilaasunik kinguaattoortunik angallassiniernermut atatillugu timmisartumik attartorneq
- Ilaasut unikkallarnerat, inissiineq
- Ilaasut unikkallarnerat, nerisaqartitsineq
- Ilaasut unikkallarnerat, angallassinierit (taxat)
- Taarsiiviginninnerit"

Apeqquut 5: Naalakkersuisut maluginiarsimanerlugu sooq Nuup avataaniittut angalasut, naak Nuummukartussaannikkaluit amerlasoorpassuit, Nuukkoorteqqaarneqartalernerat?

Akissut: Sanaartornerit aallartinneqarnerini naatsorsuutigineqarpoq, Ilulissani aamma Nuummi mittarfissat ataatsikkut naammassineqassasut. Taamaalilluni ilaasut 5 %-iinnaat Kangerlussuarmukartarnerini ilaasut amerlanerpaartaat Kangerlussuakkooqqaaratik, pingaarnertut ornitaminnut apuuttassasut naatsorsuutigineqarluni (Deloitte-p

nalunaarusiaa 'Nuuk Ilulissallu ukkataralugit inuiaqatigiit aningaasaqarnerinut sunniutissanik naliliinerup nutarternera, Marts 2022')

Taamaalilluni imarpik qulaallugu timmisartuussinernut mittarfiit taakkua marluk imminnut tapertariissinnaassapput, nunallu immikkoortortaanni akunnittarfittut ingerlallutik. Taamaakkaluartoq Ilulissani mittarfissap naammassineqarnissaa kinguaattooqqammat, naammassineqarnissaata tungaanut Nuuk pingaarnertut akunnittarfittut inissisimagallarpoq. Ilulissani mittarfissaq naammassineqarluni atulerpat, mittarfiit taakkua marluk akornanni angalasut akunnittarnerisa amerlassusaata agguataarneqarneratigut Nuummi mittarfiup eqqugaanera annikillissasoq naatsorsuutigineqarpoq. Taassumap kingunerisaanik ilaasut 68 %-it missaanniittut Kangerlussuakkooqqaartariaqaratik pingaarnertut ornitaminnut apuuttassapput (Deloitte-p nalunaarusiaa 'Nuuk Ilulissallu ukkataralugit inuiaqatigiit aningaasaqarnerinut sunniutissanik naliliinerup nutarternera, Marts 2022').

Apeqqu 6: Tamanna Nuummi mittarfiup akitsuutinik (lufthavnafgift-inik) innuttaasut sinerissamiittut akilersueqaatanerunissaannik siunertaqarnersoq paaserusunnarpoq?

Akissut: *Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalersorneqarnissaannullu killiliussatut piumasaqaatit pillugit Inatsisartut inatsisaanni nr. 4, 22. november 2018-imeersumi § 15-imi allassimavoq, ingerlatseqatigiiffiup (Greenland Airports A/S-ip) suliaqarnera tamarmiusoq niuerneramik tunngaveqartumik ingerlanneqassasoq.*

Angalasut nunaqarfimmeeraluarunik imaluunniit illoqarfimmit allameeraluarunik, mittarfimmut akitsuut, atuisunit (angalasunit) akilernerqartarpoq. Kangerlussuarmi Mittarfik akunnittarfiugallarmat taamatut aamma ippoq.

Apeqqu 7: Taamaassimappat peqqutaasut aggulunneri Naalakkersuisut saqqummiussinnaavaat?

Akissut: Takuuk apeqqu 6.

Apeqqu 8: 2018-imi mittarfiit pillugit inatsisartut aalajangerniarneranni tunngavigineqartumi (Deloitte suliaani) qanoq annertutigisumik kinguaattoornernut aningaasartuuteqartoqarnissaa annertussuseqarpa?

Akissut: Massakkut pissutsini kinguaattoornerni aningaasartuutaasinnaasut Deloitte-p 2018-imi nalunaarusiaani aningaasartalerneqarnikuunngillat. Nunat tamalaat akornanni mittarfiit Ilulissanut, Nuummullu allanngortinneqarnerini inuiaqatigiinnut kinguneqaataasinnaasut nalunaarusiami ukkatarineqarput.

Apeqqu 9: Nuummi mittarfik timmisartut orsertarnissaannut mittarfimmi (biiliunngitsunik) tankeqarpa?

Akissut: Akissuteqarnissamut atatillugu Greenland airports A/S-imit paasissutissat pissarsiarineqarput, tassanilu ima paasissutissiivoq:

"Greenland Airports Nuummi immikkuullarissumik timmisartup orsussaanut marlunnik tankiuteqarpoq. Tankit taakkua marluk nunamiipput, mittarfimmulli isumannaallisaalluni ungalusap eqqaanniillutik."

Apequt 10: Ilulissani Qaqortumilu mittarfiit sanaartorneqartut (biiliunngitsunik) mittarfimmi tankilerneqassappat?

Akissut: Akissuteqarnissamut atatillugu Greenland Airports A/S-imit paasissutissat pissarsiarineqarput, tassanilu ima paasissutissiivoq:

"Timmisartup orsussaanut Ilulissat mittarfiani tankissanik pisisoqassanersoq sulii aalajangiisoqarnikuunngilaq. Ilulissat mittarfiani orsussalerinissamut inaarutaasumik ilusissaq Greenland Airports-ip inaarsaleruttorpaa."

"Qaqortumi timmisartup orsussaanut tankiliisoqassanngilaq. Greenland Airports-ip massakkut naatsorsuutiginnngilaq, timmisartup orsussaanik tunisinertup annertussusissaatut naatsorsuutigineqartup kingunerisaanik tankiliisoqartariaqassasoq."

Apequt 11: Nuummi mittarfiup saarpiaaniittut biilinit unittarfiit (parkering) allanngortiterneqassamaapat?

Akissut: Akissuteqarnissamut atatillugu Greenland Airports A/S-imit paasissutissat pissarsiarineqarput, tassanilu ima paasissutissiivoq:

"Nunat tamalaat akornanni timmisartuussisarnernut atatillugu nunami, nunallu tamalaat akornanni malittarisassanik naammassinnitsillugu Nuummi mittarfik ilusilerneqarnikuuvoq. Isumannaallisaanermi malittarisassat tassani aamma ilanngullugit. Mittarfiit eqqaanni biilinit inissiiviit tamanut atugassiat, aammali biilinit inissiiviit mittarfimmi sulisunut atugassiat qanoq atorneqassanersut malittarisassani allassimavoq. Terminaleqarfiup eqqaanni biilinit inissiiviit, sulisunut atugassiaapput. Malittarisassat assigiinngitsut, matumani aamma mittarfinni biilinit inissiivinnut Trafikstyrelsen malittarisassaatai patsisaallutik, taakkua tamanit atorneqarsinnaasunngortillugit allanngortinneqarsinnaanngillat."

Apequt 12: Nuummi mittarfimmi nassatanik tunniussivissat aaqqinneqarnissaat qanoq pilersaarutigineqarpat?

Akissut: Akissuteqarnissamut atatillugu Greenland Airports A/S-imit paasissutissat pissarsiarineqarput, tassanilu ima paasissutissiivoq:

"Akunnerup ataatsip iluani tikittut 400-sinnaatillugit, 400-llu aallarsinnaatillugit, Nuup mittarfiani terminali ilusiligaavoq. Tamanna angusinnaaqkullugu nassatanik tunniussisarfiit arlallit pilersinneqarnikuupput. Nuup mittarfiani nassatanik tunniussisoqarsinnaatillugu, Greenland Airportsip nassatanik tunniussiviit timmisartortitseqatigiiffinnut allanut atugassanngortittarpai. Nassatanik tunniussisarneq angalasunit pitsaasumik misigisaqarfigineqarsinnaasunngorlugu tamanna qanoq iluarsineqarsinnaanersoq pillugu Greenland Airportsip suleqatigisat attuumassuteqartut oqaloqatigai. Taassumap saniatigut apeqput 13-imi akissut innersuussutigineqarpoq."

Apeqput 13: Nassatanik tunniussivissat amerlineqassappat?

Akissut: Akissuteqarnissamut atatillugu Greenland Airports A/S-imit paasissutissat pissarsiarineqarput, tassanilu ima paasissutissiivoq:

"Oqaatigineqassaaq, Nuup mittarfiani "nassatanik nammineq tunniussivissaq"-mik ikkussisoqarnikummat. Ajoraluartumik taanna suli atulinngilaq. Tassannga misilittaanermut atatillugu kukkuneq iluarsineqassaguni arlalitsigut, matumani aamma IT-software ilanngullugu, iliuuseqarfigineqartariaqartoq paasineqarpoq. Ilimagineqaqqaartumit kukkuneq naammassiuminaannerusimavoq, qaammatialuilli iluini systemi iluarsineqassasoq naatsorsuutigineqarluni. Greenland Airports-ip naatsorsuutigaa, "nassatanik nammineq tunniussivissaq" atulerpat, nassatanik tunniussisarnerup pitsaanerulersinneqarnissaanut taanna tapertaassasoq."

Apeqput 14: Nuummi ajornartorsiutit ilisimaleriikkat Ilulissani Qaqortumilu pinnginnissaat qulakkeerniarlugu Naalakkersuisut sanaartortunut oqaloqateqarnikuuppat?

Akissut: Akissuteqarnissamut atatillugu Greenland Airports A/S-imit paasissutissat pissarsiarineqarput, tassanilu ima paasissutissiivoq:

"Nuup mittarfiatigoorlutik angalasut pitsaasumik misigisaqarnissaat qulakkiissallugu Greenland Airports-ip annertuumik ukkataraa. Nuummi pissutsit Greenland Airports-ip ataavartumik nalilersortarpai. Nassatanik tunniussiniarnermut atatillugu utaqqisorpassuaqartarsimasoq Greenland Airports-ip eqqumaffigaa. Greenland Airports isumaqarpoq, nassatanik tunniussisarneq eqqarsaatigalugu "nassatanik nammineq tunniussivissaq" atorsinnaalerpat, angalasussat nassataminnik tunniussiniarnerminni misigisaasa pitsaanerulersinneqarnissaanut

tamanna tapertaassasoq. Nassatanik tunniussisarnermi systemi tamakkiisoq atulerpat tamanna naliliiffigineqassaaq, tamannalu tunuliaqutaralugu nassatanik tunniussisarnermi piffissap ingerlanerani annerusumik suliniuteqartoqassanersoq Greenland Airports-ip nalilissallugu.”


Naalakkersuisut Greenland Airports A/S ataavartumik oqaloqatigaat, Ilulissanilu aamma Qaqortumi mittarfinnik ingerlatsilernermi Nuummisulli ajornartorsiuteqalinnginnissaata qulakkeerneqarnissaanut, Nuup Mittarfiani ingerlatsilernermi misilittakkat ingerlatseqatigiiffiup atornissaanut qulakkeerneqassallutik. Naalakkersuisut ataavartumik malinnaaniarput.

Apeqquut 15: Naalakkersuisut allanik paasissutissaasinnaasunik peqarpat?

Akissut: Naalakkersuisut allanik paasissutissaateqanngillat.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Aqqaluq B. Egede